

## **UNE AUTONOMIE RIDUSUDE A UN FREGUL DI DECENTRAMENT PARALITIC**

La grande sorprese di cheste setemane - par cui che si interesse de vite dal Friûl, si capìs, no pai zuiadôrs dal SISAL - e je stade la risoluzion de Assemblee plenarie dai 75 di lavâsi lis mans sul cont de Autonomie furlane, e di lassâ che si distrighi la Constituent. In cheste ocasion, un deputât de Concentrazion Democratiche, l'onorevul Fabbri, al à fat presint - altre sorprese - che il Friûl al è une Regjon mistilingue, cun minorancis alogjenis" e che al varès dirit a un ordenament particolâr come la Valdoste e il Trentin-Sud Tirôl.

Il "leader" dal Partît Comunist, onorevul Palmiro Togliatti - tierce sorprese - i à dade reson. Cualchi altri al à dite che al è vêt, ma che i Furlans no àn mai domandade une autonomie speciâl. E cheste e varès di jessi une sorprese almancul par noaltris di "Patrie dal Friûl" che o vin scomençât a domandâ cheste forme di autonomie a pene che la Seconde Sotcomission e à tacât i siei lavôrs; ma o savìn che nissun nol è plui sort di cui che nol vûl sintî.

E alore i 75 no àn savût ce dí, ni ce pensâ e si son tirâts indaûr.

O vin pôre che cheste cessade no sedi nuie di bon par noâltris. A Rome si scomence a clopâ; lis fuarcis acentrativis a tornin a fâsi sintî: il lavôr soterani de burocrazie in pericol al sta roseant lis lidrîs de gnove Costituzione. O vin za viodût il "revirement" de Assemblee plenarie sul cont des autonomiis in gjenerâl e la staronzade che e à dade ai prins articui dal progjet di leç preparât dai components de Seconde Sotcomission. O credìn che ae Assemblee gjenerâl Constituent e sarâ bataie gruesse cuant che si tratarà di esaminâ cheste partide e che la leç costitutive des regjons e passarà nome cun altris staronzadis e scurtadis e modificazions che ridusaran lis autonomiis a un fregul di decentrament paralitic. Cussì la sostanzie e restarà come che e je, cun dutis lis sôs rognis, lis sôs camoris, i sfrutaments e i berdeis di cumò.

pre Bepo - Patrie dal Friûl / 1947